

Cu e obhetivo di enfoca riba e labor educativo na Aruba y e diferente actividadnan escolar cu lo tuma luga durante diferente fecha durante henter aña escolar cu a caba di inicia, **BONDIA ARUBA** ta cuminsa cu un pagina di Enseñansa pa duna un espacio importante na tur scolnan y demas instancianan educativo, pa informa pueblo tocante nan vision, mision, metanan, actividadnan, cuida na scol, labor social y tur otro topico cu e institucion escolar ta haya di balor pa trece dilanti.

Tur docentenan, alumnonan, mayornan y comunidad en general ta wordo invita pa forma parti di e seccion aki. Un pagina crea pa muestra e parti positivo di nos sector educativo y pone enfasis riba un trabou diario cu ta merece tur e atencion y apoyo di nos tur. Manera un di e frasenan mas importante di Nelson Mandela ta bisa "Educacion ta e arma mas poderoso cu por cambia mundo". Nos redactor y fotografo Dino Tromp lo pasa bishita tur scol pa sa kico nan kier trece dilanti. Di antemano masha danki pa boso cooperacion.



Cacique Macuarima School

Cacique Macuarima School ta un scol basico situa den e barrio di Macuarima.

Na aña 1970 e scol a habri su

portanan pa muchanan cu ta biba den bisindario. E aña aki e scol ta celebrando 45 aña di existencia.

E prome cabesante di Cacique Macuarima School



tawata mr. Coco Coronel q.e.p.d. E scol a cuminsa como un scol chikito di 6 klas cu un kleuterschool na dje. Na momento cu mr. Coronel a baha cu pensioen juffrouw Evelina Rincones Dirksz a tuma e scol over y tambe a dirigi e scol pa un periodo largo. E scol a crece masha hopi y a bira un scol di 12 klas y e kleuterschool a bira un scol independiente esta Cacique Aterima School. Na aña 2010 juffrouw Evelina a baha cu pensioen y su sucesor a bira juffrouw Mary Rasmijn Stamper kende a dirigi e scol pa 5 aña. Na aña 2015 juffrouw Rachel Croes Caster a bira cabesante di e scol.

E scol ta conta actualmente cu 235 alumno, 12 maestro, un guia pa lesamento y un guia interno y un maestro di movecion y salud. Proyectonan cu ta andando den e scol ta entre otro proyecto di TPH contra termento, proyecto di disciplina consciente y e proyecto di Scol Saludabel. Cacique Macuarima School ta pone hopi atencion na e educacion, bienestar y siguridad di su alumnonan.



E scol ta participa hopi activo cu actividadnan social/educativo. Diabierna ultimo e scol a celebra dia di Cacique Macuarima cu actividad educativo; informacion di Parke Nacional Arikok y Museo Arkeologico sigui pa

actividad recreativo; wega den awa. Pa celebra su 45 aña e aña aki Cacique Macuarima School tin hopi actividad mas planea y ta spera di por conta cu cooperacion di mayornan y comunidad. □

